

**O‘ZBEKISTON RESPUBLIKASI PREZIDENTINING
QARORI**

**O‘ZBEKISTON DAVLAT KONSERVATORIYASI FAOLIYATINI YANADA
RIVOJLANTIRISH VA TAKOMILLASHTIRISH CHORA-TADBIRLARI TO‘G‘RISIDA**

Mamlakatimizda mustaqillik yillarida madaniyat sohasini izchil rivojlantirish, jahon miqyosidagi ijobiy tajriba va tendensiyalar, yutuq va natijalarni har tomonlama chuqur o‘rganish asosida madaniyat va san‘at muassasalari faoliyatini samarali yo‘lga qo‘yish, ularning tarmog‘ini kengaytirish, moddiy-texnik bazasi, kadrlar salohiyatini mustahkamlash masalalariga alohida e‘tibor berilmoqda.

Ayni shu maqsadda 2002-yilda qabul qilingan O‘zbekiston Respublikasi Prezidentining farmoniga binoan Toshkent davlat konservatoriyasi uchun yangi bino qurilib, u zamonaviy talablar asosida jihozlandi. Ushbu oliy o‘quv yurtining nufuzi va maqomini oshirish uchun unga “O‘zbekiston davlat konservatoriyasi” nomi berildi, konservatoriya qoshida iqtidorli yoshlar uchun akademik musiqa litseyi ham tashkil etildi.

O‘zbekiston davlat konservatoriyasi faoliyatining tanqidiy tahlili o‘tgan davr mobaynida ushbu oliy ta‘lim muassasasi tomonidan akademik va milliy musiqa san‘ati yo‘nalishlarida yuqori malakali kadrlar tayyorlash, o‘quv-pedagogik va ilmiy-ijodiy ishlarni tashkil etish borasida muayyan yutuqlarga erishilganini, shu bilan birga, bir qator jiddiy kamchilik va nuqsonlarga ham yo‘l qo‘yilganini ko‘rsatmoqda.

Mutasaddi tashkilotlar, birinchi navbatda Madaniyat vazirligi, Oliy va o‘rta maxsus ta‘lim vazirligi tomonidan yetarli darajada amaliy yordam va ko‘mak berilmagani, tegishli nazorat olib borilmagani, mas‘uliyat va talabchanlik bo‘shashtirib yuborilgani oqibatida O‘zbekiston davlat konservatoriyasi mamlakatimiz madaniy hayotidagi o‘zining yetakchi o‘rni, obro‘-e‘tibori va ta‘sirini yo‘qotib borayotgani, uning faoliyati bugungi zamon talablaridan orqada qolayotgani, bu borada kechiktirmasdan hal qilish zarur bo‘lgan bir qancha jiddiy muammolar mavjudligi yaqqol ko‘zga tashlanmoqda.

Jumladan, ta‘lim-tarbiya ishlarining zamonaviy standartlar va sohaning o‘ziga xos xususiyatlari asosida to‘g‘ri tashkil etilmagani, o‘quv dasturlari va metodikasining mukammal emasligi, darslik va qo‘llanmalarining yetishmasligi, professor-o‘qituvchilar, ilmiy va ijodiy xodimlarning salohiyati aksariyat hollarda talabga javob bermasligi, konservatoriyaning moddiy-texnik bazasi nochor ahvolga kelib qolgani tashvish uyg‘otmasdan qolmaydi. O‘zbekiston davlat konservatoriyasida o‘qishga qabul qilish kvotalarida nomutanosiblik vujudga kelgani, xususan, 700 nafar o‘quv o‘rni mavjud bo‘lgani holda, amalda 1346 nafar talaba tahsil olayotganini albatta normal holat sifatida baholab bo‘lmaydi.

Mana shunday kamchilik va muammolar o‘z navbatida ushbu oliy ta‘lim muassasasi oldiga qo‘yilgan vazifalarni to‘laqonli va samarali amalga oshirishga, madaniyat sohasi uchun yuqori malakali mutaxassislar tayyorlash sifatiga salbiy ta‘sir ko‘rsatmoqda.

Xalqimiz, xususan, yoshlarimizning dunyoqarashi, ma‘naviy saviyasi va estetik tarbiyasini yuksaltirishda g‘oyat muhim o‘rin va ahamiyatga ega bo‘lgan musiqa san‘atini har tomonlama rivojlantirish, boy musiqiy merosimizni chuqur o‘rganish, yosh avlodni milliy va jahon musiqa san‘atining mumtoz namunalariga muhabbat ruhida tarbiyalash, soha uchun yuqori malakali kadrlar tayyorlash tizimini yanada takomillashtirish maqsadida:

1. Quyidagilar:

O‘zbekiston davlat konservatoriyasi faoliyatini yanada rivojlantirish va takomillashtirishga doir chora-tadbirlar dasturi (keyingi o‘rinlarda — Dastur deb ataladi) 1-ilovaga;

O‘zbekiston davlat konservatoriyasining tarkibiy tuzilmasi 2-ilovaga;

O‘zbekiston davlat konservatoriyasi faoliyatini yanada rivojlantirish va takomillashtirishga doir chora-tadbirlar dasturini amalga oshirish bo‘yicha Respublika komissiyasi tarkibi 3-ilovaga muvofiq tasdiqlansin.

2. Dasturning asosiy yo‘nalishlari etib quyidagilar belgilansin:

o'zbek xalqining milliy musiqiy merosi va jahon musiqa madaniyati durdonalari negizida musiqa san'atini rivojlantirish, musiqiy ta'lim tizimini sifat jihatidan yanada ko'tarish;

aholimiz, birinchi navbatda yoshlarni milliy va umumbashariy musiqa san'atining eng yaxshi namunalaridan bahramand etish, shu asosda ularning madaniy saviyasini yuksaltirish, ma'naviy yetuk va barkamol shaxslarni tarbiyalash;

mulkiy yoki idoraviy mansubligidan qat'i nazar, musiqa san'ati, musiqa ta'limi yo'nalishi uchun kadrlar tayyorlash, normativ-huquqiy hujjatlar loyihalarini ishlab chiqish va ularni joriy etish bo'yicha kelishuvlarda O'zbekiston davlat konservatoriyasi metodik va ijodiy jihatdan tayanch oliy ta'lim muassasasi ekanini e'tirof etish;

O'zbekiston davlat konservatoriyasining moddiy-texnik bazasini yanada mustahkamlash, jumladan, konsert zallari, auditoriyalar va maxsus xonalarni ta'mirlash va zamon talablari darajasida jihozlash;

konservatoriyada faoliyat ko'rsatayotgan professor-o'qituvchilarning ilmiy-pedagogik mahoratini oshirish, o'quv jarayoni sifati va saviyasini tubdan yaxshilash, musiqa san'ati sohasida jahonning yetakchi oliy ta'lim muassasalari, ijodiy markazlar, taniqli kompozitor, musiqachi va ijrochilar bilan hamkorlikni yo'lga qo'yish, jumladan, xorijiy mutaxassislarni mamlakatimizga taklif etish bilan bir qatorda respublikamizda yuqori natijalarga erishgan musiqachi va pedagoglarning mahorat darslarini chet davlatlarda tizimli tashkil etish;

O'zbekiston davlat konservatoriyasining yosh pedagog kadrlarini moddiy va ma'naviy qo'llab-quvvatlash maqsadida zarur maishiy sharoitlar yaratish, ipoteka kreditlari asosida uy-joy bilan ta'minlash bo'yicha aniq chora-tadbirlar ishlab chiqish va amalga oshirish;

Konservatoriya va uning tarkibidagi Iqtidorli bolalar akademik litseyi professor-o'qituvchilari hamda talabalarining ijodiy faolligini yanada oshirish, yozgi ta'til davomida yoshlarning bo'sh vaqti mazmunli o'tishi uchun Toshkent viloyati Bo'stonliq tumanida joylashgan sanatoriyni "Musiqa oromgohi" degan nom bilan konservatoriya tasarrufiga o'tkazish.

3. Belgilab qo'yilsinki, konservatoriyaning maqomi va nufuzini oshirish maqsadida O'zbekiston Respublikasi madaniyat vaziri bir vaqtning o'zida O'zbekiston davlat konservatoriyasining rektori hisoblanadi.

4. O'zbekiston Respublikasi Madaniyat vazirligi:

O'zbekiston davlat konservatoriyasida o'quv binolari yetishmaganligi sababli hamda talabalar kontingenti sezilarli darajada ortganini inobatga olib, 2018/2019 o'quv yilidan boshlab Toshkent shahar hokimligi bilan birgalikda bir oy muddatda Mirzo Ulug'bek tumanidagi, Mustaqillik prospekti, 31-uyda joylashgan V. Uspenskiy nomidagi respublika ixtisoslashtirilgan musiqa akademik litseyiga tegishli bo'lgan binoni O'zbekiston davlat konservatoriyasiga o'rnatilgan tartibda berilishini ta'minlasin;

O'zbekiston Respublikasi Xususiylashtirilgan korxonalarga ko'maklashish va raqobatni rivojlantirish davlat qo'mitasi va Toshkent shahar hokimligi bilan birgalikda bir oy muddatda Toshkent shahri, Buxoro ko'chasi, 10-uyda joylashgan binoni O'zbekiston davlat konservatoriyasi tasarrufiga o'tkazish va ushbu binoda jahon andozalariga to'liq mos bo'lgan, akademik jamoalarning badiiy dasturlari namoyish etiladigan, jonli ijroga mo'ljallangan zamonaviy konsert zalini barpo etish bo'yicha O'zbekiston Respublikasi Vazirlar Mahkamasiga taklif kiritilsin.

O'zbekiston Respublikasi Madaniyat vazirligi mazkur loyihalarni amalga oshirishda xorijiy mutaxassislar bilan hamkorlikda konservatoriyaning loyihalashtirish, qurilish va ta'mirlash ishlarida mas'ul etib belgilansin.

Uch oy muddatda O'zbekiston davlat konservatoriyasi binosida "Noyob cholg'ular davlat kolleksiyasi"ni tashkil etish bo'yicha O'zbekiston Respublikasi Vazirlar Mahkamasiga taklif kiritilsin;

to'rt oy muddatda O'zbekiston davlat konservatoriyasiga abituriyentlarni o'qishga qabul qilish bo'yicha o'tkaziladigan kasbiy (ijodiy) kirish imtihonlari tartibiga o'zgartirishlar kiritish yuzasidan O'zbekiston Respublikasi Vazirlar Mahkamasiga takliflar kiritilsin;

2018-yilning 1-martiga qadar O'zbekiston davlat konservatoriyasi muassisligida musiqa san'ati ta'lim-tarbiyasi bo'yicha "Musiqa" ilmiy-uslubiy jurnali faoliyatini tashkil etsin;

respublikadagi eng yaxshi bolalar musiqa va san'at maktablari, madaniyat va san'at kollejlari konservatoriyaning tayanch ijodiy markazlarini tashkil etsin hamda ularga konservatoriyaning yetakchi professor-o'qituvchilarini yuborib, "Mahorat maktabi" mashg'ulotlarini o'tkazishni yo'lga qo'ysin;

noyob va murakkab cholg'u sozlarini yanada puxta o'zlashtirishlari uchun har yili yosh ijrochilar va texnogen san'at turlari mutaxassislarini xorijdagi nufuzli musiqa akademiyalari va konservatoriylariga kelishuv shartnomalari asosida Madaniyat vazirligi qoshidagi budjetdan tashqari Madaniyat va san'atni rivojlantirish jamg'armasi mablag'lari hisobidan qisqa muddatli (2-3 oygacha) o'qishga yuborsin;

iqtidorli o'quvchi va talabalarning mamlakatimizda, xorijiy davlatlarda o'tkazib kelinayotgan nufuzli tanlov, festival va ilmiy-ijodiy konferensiyalarda Madaniyat vazirligi qoshidagi budjetdan tashqari Madaniyat va san'atni rivojlantirish jamg'armasi mablag'lari hisobidan muntazam ishtirok etishlarini ta'minlasin.

5. Quyidagilar Dasturni amalga oshirishning moliyaviy manbalari etib belgilansin:

O'zbekiston Respublikasi Moliya vazirligi huzuridagi budjetdan tashqari Ta'lim va tibbiyot muassasalarining moddiy-texnika bazasini rivojlantirish jamg'armasi mablag'lari — 2018-2019-yillarda O'zbekiston davlat konservatoriyasi qoshida musiqa sohasi pedagoglarini qayta tayyorlash va malakasini oshirish markazi va 400 o'rinli yotoqxona binolarini qurish va jihozlash qismida;

O'zbekiston Respublikasi Tashqi iqtisodiy faoliyat milliy bankining tashabbusi bilan xayriya asosida ajratiladigan mablag'lar — Toshkent shahar, Shayxontohur tumani, Olmazor ko'chasi, 1-uy manzilida joylashgan O'zbekiston davlat konservatoriyasining bino va inshootlarining moddiy-texnik bazasini modernizatsiya qilish qismida;

O'zbekiston Respublikasi Madaniyat vazirligi huzuridagi budjetdan tashqari Madaniyat va san'atni rivojlantirish jamg'armasi mablag'lari — "Noyob cholg'ular davlat kolleksiyasi"ni, "Musiqa" ilmiy-uslubiy jurnali faoliyatini tashkil etish, yosh ijrochilar va texnogen san'at turlari mutaxassislarini xorijdagi nufuzli musiqa akademiyalari va konservatoriylariga o'qishga yuborish, iqtidorli o'quvchi va talabalarning mamlakatimizda, xorijiy davlatlarda o'tkazib kelinayotgan nufuzli tanlov, festival va ilmiy-ijodiy konferensiyalarda ishtirok etishlarini ta'minlash qismida;

yuridik va jismoniy shaxslarning homiylik xayriyalari, qonun hujjatlarida taqiqlanmagan boshqa mablag'lar — boshqa tadbirlarni bajarish qismida.

6. Toshkent shahar hokimligi O'zbekiston davlat konservatoriyasida faoliyat yuritayotgan yuqori malakali xodimlar, jumladan, iqtidorli yosh mutaxassislar uchun munosib turarjoy sharoitlarini yaratish maqsadida ipoteka kreditlari asosida Toshkent shahrida quriladigan ko'p qavatli uylardan uy-joylar ajratilishini ta'minlasin.

7. O'zbekiston Respublikasi Vazirlar Mahkamasi mazkur qaror ijrosini ta'minlash bo'yicha Hukumatning tegishli qarorini qabul qilsin.

8. O'zbekiston Respublikasi Madaniyat vazirligi O'zbekiston Respublikasi Adliya vazirligi bilan birgalikda bir oy muddatda qonun hujjatlariga ushbu qarordan kelib chiqadigan o'zgartirish va qo'shimchalar kiritish to'g'risida O'zbekiston Respublikasi Vazirlar Mahkamasiga takliflar kiritilsin.

9. Mazkur qarorning ijrosini nazorat qilish O'zbekiston Respublikasi Bosh vaziri A. Aripov, O'zbekiston Respublikasi Prezidentining Davlat maslahatchilari X. Sultonov va A. Yunusxodjayev zimmasiga yuklansin.

O'zbekiston Respublikasi Prezidenti Sh. MIRZIYOYEV

Toshkent sh.,
2017-yil 8-avgust,
PQ-3178-son

**O'zbekiston davlat konservatoriyasi faoliyatini yanada rivojlantirish va takomillashtirishga
doir chora-tadbirlar**

DASTURI

T/R	Tadbirlar nomi	Ijro muddati	Mas'ul ijrochilar
I. O'zbekiston davlat konservatoriyasi moddiy-texnik bazasini mustahkamlash			
1	Musika san'ati ta'lim muassasalarini maxsus adabiyotlar bilan ta'minlash, ularni muntazam nashr qilib borish maqsadida konservatoriya huzurida ixtisoslashtirilgan musiqa nashriyoti va bosmaxona tashkil etish, mavjud ovoz yozish studiyasining moddiy-texnik bazasini mustahkamlash.	2018-yil II chorak	Madaniyat vazirligi, Oliy va o'rta maxsus ta'lim vazirligi, O'zbekiston matbuot va axborot agentligi, Toshkent shahar hokimligi, O'zbekiston davlat konservatoriyasi
2	O'zbekiston davlat konservatoriyasi qoshidagi "Milliy cholg'u" ilmiy-ishlab chiqarish eksperimental laboratoriyasi qoshidagi "Musika cholg'ulari muzeyi" faoliyatini yaxshilash, "Konservatoriya tarixi muzeyi"ni moddiy ta'minlash.	2018-yil II chorak	Madaniyat vazirligi, O'zbekiston davlat konservatoriyasi
3	2018/2019 o'quv yilidan boshlab O'zbekiston davlat konservatoriyasi qoshida musiqa sohasi pedagoglarini qayta tayyorlash va malakasini oshirish Markazini tashkil etish, shu maqsadda yangi o'quv binosi va tinglovchilar uchun turar joyi qurish hamda talabalar va malaka oshirish uchun kelgan tinglovchilarning bo'sh vaqtlarini mazmunli o'tkazish, jismonan sog'lom bo'lishi maqsadida konservatoriya hududiga tutash sport maydonchasini tashkil etish.	2018/2019 o'quv yilidan boshlab	Madaniyat vazirligi, Iqtisodiyot vazirligi, Moliya vazirligi, Arxitektura va qurilish davlat qo'mitasi
4	O'zbekiston davlat konservatoriyasi binosini akustik talablarni inobatga olgan holda kapital ta'mirlash, mamlakatimizda va xorijda ishlab chiqarilayotgan musiqa cholg'ulari, texnik vositalar, inventar va zamonaviy uskunalar bilan jihozlash.	2019-yil mobaynida	Toshkent shahar hokimligi, Madaniyat vazirligi, Iqtisodiyot vazirligi, Tashqi iqtisodiy faoliyati milliy banki
5	Konservatoriyada talabalar mustaqil shug'ullanishlari uchun yetarli repetitoriyalar tashkil etish, mustaqil mashg'ulot o'tkazishlari uchun xonalar ajratish va yaxshi sozlangan cholg'ular bilan jihozlash, shuningdek, konservatoriya yotoqxonasida ham shunday sharoitlarni yaratish.	2019-yil mobaynida	Toshkent shahar hokimligi, Madaniyat vazirligi, Iqtisodiyot vazirligi, Tashqi iqtisodiy faoliyati milliy banki

6	O'zbekiston davlat konservatoriyasida o'rnatilgan noyob organ cholg'usini ta'mirlash, doimiy texnik xizmat ko'rsatishni tashkil etish va organ zalini avtomatik haroratni saqlab turish uskunolari bilan ta'minlash.	2019-yil mobaynida	Madaniyat vazirligi, Tashqi iqtisodiy aloqalar va investitsiyalar vazirligi, Iqtisodiyot vazirligi, Tashqi iqtisodiy faoliyati milliy banki
7	O'zbekiston davlat konservatoriyasida musiqiy adabiyotlar, o'quv uslubiy majmualar hamda nota matnlarini chop etishga ixtisoslashtirilgan maxsus bosmaxona tashkil etish.	2018-yil mobaynida	Madaniyat vazirligi, Davlat nashriyot va matbaa qo'mitasi, Toshkent shahar hokimligi
8	O'zbekiston davlat konservatoriyasi tarkibidagi Musiqali teatr-studiyasining moddiy-texnik bazasini mustahkamlash, o'quv ishlab-chiqarish jamoalari hisoblangan simfonik orkestr, xalq cholg'ulari orkestri va xor artistlarining maosh razryadlarini respublika professional badiiy jamoalar xodimlari maosh razryadlarini o'rganib, tegishli xulosalarni tayyorlash.	2018-2019 o'quv yilidan	Toshkent shahar hokimligi, Madaniyat vazirligi, Iqtisodiyot vazirligi, Moliya vazirligi, Bandlik va mehnat munosabatlari vazirligi, Adliya vazirligi
9.	2017-yil oktyabr oyiga qadar O'zbekiston davlat konservatoriyasi binosini issiqlik bilan ta'minlash bo'yicha lokal isitish qozonxonasini o'rnatish.	2017-yil oktyabr	Madaniyat vazirligi, "Tashisliqlikquvvat", Moliya vazirligi, Toshkent shahar hokimligi,
II. O'zbekiston davlat konservatoriyasida o'quv-uslubiy va me'yoriy-huquqiy hujjatlarini takomillashtirish			
10.	O'zbekiston davlat konservatoriyasi bitiruvchilari diplomida Davlat attestatsiyasi komissiyasining qaroriga binoan qayd etiladigan malaka talablari, shuningdek, ta'lim muassasasining bakalavriat yoki magistratura bosqichlari uchun mo'ljallangan normativ-huquqiy hujjatlarini tanqidiy o'rganib chiqib, ularni takomillashtirish choralari ko'rish.	2017-yilidan muntazam	Madaniyat vazirligi, Oliy va o'rta maxsus ta'lim vazirligi, Ta'lim sifatini nazorat qilish davlat inspeksiyasi, Bandlik va mehnat munosabatlari vazirligi, O'zbekiston davlat konservatoriyasi
11.	Konservatoriyaning mutaxassislik yo'nalishida kasbiy (ijodiy) kirish imtihonlarini tashkil etishni tubdan o'zgartirish bo'yicha takliflarni ishlab chiqib, Davlat qabul komissiyasiga kiritish.	2017-yilidan muntazam	Madaniyat vazirligi, Oliy va o'rta maxsus ta'lim vazirligi, Ta'lim sifatini nazorat qilish davlat inspeksiyasi, Bandlik va mehnat munosabatlari vazirligi, O'zbekiston davlat konservatoriyasi
12.	Musiqqa ta'limi uzviyligi va uzluksizligini ta'minlash maqsadida bolalar musiqa va san'at maktablari, o'rta maxsus va oliy ta'lim muassasalari fanlararo bog'liqligi va integratsiyasini takomillashtirish.	muntazam	Madaniyat vazirligi, Oliy va o'rta maxsus ta'lim vazirligi


13.	O'zbekiston davlat konservatoriyasida oliy ta'limdan keyingi ta'lim turida ijrochilar uchun assistentura-stajirovka ta'limini qayta tiklash, Konservatoriyada musiqa san'ati bo'yicha falsafa doktori (PhD) ilmiy darajasini beradigan ixtisoslashtirilgan ilmiy kengash faoliyatini yo'lga qo'yish.	2018-yildan boshlab	Vazirlar Mahkamasi huzuridagi OAK, Madaniyat vazirligi, Oliy va o'rta maxsus ta'lim vazirligi, O'zbekiston Fanlar akademiyasi
III. Musiqa ta'limi muassasalarini ilmiy-pedagogik kadrlar bilan ta'minlash, aytayta tayyorlash, ularni malakasini oshirish va moddiy rag'batlantirish			
14.	O'zbekiston davlat konservatoriyasi huzurida bolalar musiqa va san'at maktablari, akademik litsey va kollejlari o'qituvchilarining malakasini oshirish va qayta tayyorlash bo'yicha me'yoriy-huquqiy hujjatlarni ishlab chiqish va belgilangan tartibda tasdiqlash.	2018-yildan boshlab muntazam	Madaniyat vazirligi, Oliy va o'rta maxsus ta'lim vazirligi, O'zbekiston davlat konservatoriyasi
15.	O'zbekiston davlat konservatoriyasi professor-o'qituvchilari ilmiy-ijodiy salohiyatidan samarali foydalanishni tashkil etish maqsadida bolalar musiqa va san'at maktablari, akademik litsey va kollejlarda ijodiy uchrashuvlar, "Ustoz saboqlari" mashg'ulotlari, seminar-treninglarni muntazam tashkil etish.	2018-yildan boshlab muntazam	Madaniyat vazirligi, Oliy va o'rta maxsus ta'lim vazirligi, O'zbekiston kompozitorlari va bastakorlari uyushmasi
16.	Konservatoriyaning asosiy kvotasiga qo'shimcha ravishda, 2018/2019 o'quv yilidan boshlab bolalar musiqa va san'at maktablari uchun pedagoglar kadrlar tayyorlash kvotasini iqtisodiyotning real sektori talab va ehtiyojni o'rgangan holda viloyatlar kesimida maqsadli shakllantirish.	2018/2019 o'quv yilidan boshlab	Madaniyat vazirligi, Oliy va o'rta maxsus ta'lim vazirligi, Davlat test markazi
IV. O'zbekiston davlat konservatoriyasining hamkorlik aloqalarini takomillashtirish			
17.	O'zbekiston davlat konservatoriyasi va xorijiy turdosh oliy ta'lim muassasalari bilan hamkorlik aloqalarini yanada mustahkamlash, 2021-yilda fortepiano, torli va damli hamda urma zarbli musiqa cholg'ulari xalqaro tanlovini muntazam ravishda har uch yilda bir o'tkazish bo'yicha chora-tadbirlar rejasini ishlab chiqib Vazirlar Mahkamasiga takliflar kiritish.	muntazam ravishda	Madaniyat vazirligi, Tashqi ishlar vazirligi, Iqtisodiyot vazirligi
18.	O'zbekiston davlat konservatoriyasida professor-o'qituvchilari uchun mahorat darslari, ilmiy-amaliy konferensiyalarga xorijiy mutaxassislarining ishtirokini	2018-yildan muntazam ravishda	Madaniyat vazirligi, Tashqi ishlar vazirligi, Iqtisodiyot vazirligi

ta'minlash, xorijiy davlatlardagi taniqli san'atkorlar bilan hamkorlikda konsert dasturlarini tashkil qilish.		
---	--	--

O'zbekiston Respublikasi Prezidentining 2017-yil 8-avgustdagi PQ-3178-sonli qaroriga
2-ILOVA

O'zbekiston davlat konservatoriyasining tarkibiy

TUZILMASI



Xodimlarining (dekanatlar, kafedralar va boshqalar) jami cheklangan soni oliy ta'lim muassasalari uchun belgilangan normativlarga muvofiq aniqlanadi.

O'zbekiston Respublikasi Prezidentining 2017-yil 8-avgustdagi PQ-3178-sonli qaroriga
3-ILOVA

O'zbekiston davlat konservatoriyasi faoliyatini yanada rivojlantirish va takomillashtirishga doir chora-tadbirlar dasturini amalga oshirish bo'yicha Respublika komissiyasi

TARKIBI

- A. Aripov — O'zbekiston Respublikasining Bosh vaziri, Respublika komissiyasi rahbari
- lavozimi bo'yicha — O'zbekiston Respublikasi Prezidentining maslahatchisi, Respublika komissiyasi rahbari o'rinbosari
- A. Abduvaxitov — O'zbekiston Respublikasi Prezidentining maslahatchisi
- R. Usmonov — Toshkent shahri hokimi
- M. Muratov — O'zbekiston Respublikasi madaniyat vaziri, Respublika komissiyasi kotibi

A. Kamilov	— O‘zbekiston Respublikasi tashqi ishlar vaziri
G. Saidova	— O‘zbekiston Respublikasi iqtisodiyot vaziri
B. Xodjayev	— O‘zbekiston Respublikasi moliya vaziri
I. Majidov	— O‘zbekiston Respublikasi oliy va o‘rta-maxsus ta’lim vaziri
B. Zakirov	— “Davarxitektqurilish” qo‘mitasi raisi
R. Gulyamov	— Xususiylashtirilgan korxonalarga ko‘maklashish va raqobatni rivojlantirish davlat qo‘mitasi raisi
B. Alixonov	— O‘zbekiston Milliy teleradiokompaniyasi raisi v. b.
A. Qodirov	— Respublika Ma’naviyat va ma’rifat markazi rahbari
R. Abdullayev	— O‘zbekiston Bastakorlar uyushmasi raisi
M. Ahmedov	— O‘zbekiston Yozuvchilar uyushmasi raisi
Z. Murodova	— O‘zbekiston Fanlar akademiyasi San’atshunoslik ilmiy-tadqiqot instituti bo‘lim mudiri, san’atshunoslik fanlari nomzodi, musiqashunos
A. Mansurov	— O‘zbekiston davlat konservatoriyasi professori
S. G‘ofurova	— O‘zbekiston davlat konservatoriyasi O‘quv ishlari bo‘yicha prorektori.

Izoh:

Komissiya a‘zolari boshqa ishga o‘tgan taqdirda uning tarkibiga ko‘rsatilgan lavozimlarga yangidan tayinlangan shaxslar yoki tegishli funksiyalarni bajarish zimmasiga yuklangan shaxslar kiritiladi.

(3-ilova O‘zbekiston Respublikasi Prezidentining 2019-yil 1-fevraldagi PF-5650-sonli Farmoni tahririda)

O‘zbekiston Respublikasi Prezidentining “O‘zbekiston davlat konservatoriyasi faoliyatini yanada rivojlantirish va takomillashtirish chora-tadbirlari to‘g‘risida”gi qaroriga

SHARH

Bugungi kunda mamlakatimizda madaniyat va san’at sohasini izchil rivojlantirish, jahon miqyosidagi ijobiy tajriba va tendensiyalar, yutuq va natijalarni har tomonlama chuqur o‘rganish asosida madaniyat va san’at muassasalari faoliyatini samarali yo‘lga qo‘yish, ularning tarmog‘ini kengaytirish, moddiy-texnik bazasi, kadrlar salohiyatini mustahkamlash masalalariga ustuvor ahamiyat berilmoqda.

O‘zbekiston Respublikasi Prezidenti Shavkat Mirziyoyevning yaqinda O‘zbekiston ijodkor ziyolilari bilan bo‘lgan uchrashuvda so‘zlagan ma’ruzasida bu boradagi vazifalar yanada aniq-ravshan belgilanib, madaniyat, adabiyot va san’at sohasini rivojlantirish bo‘yicha muhim taklif va tashabbuslar ilgari surildi. Ularning ijrosini ta’minlash bo‘yicha davlatimiz rahbari tomonidan bir qator farmon va qarorlar qabul qilinmoqda.

Bu borada, ayniqsa, “O‘zbekiston davlat konservatoriyasi faoliyatini yanada rivojlantirish va takomillashtirish chora-tadbirlari to‘g‘risida”gi qaror alohida ahamiyatga ega.

Qarorda xalqimiz, xususan, yoshlarimizning dunyoqarashi, ma’naviy saviyasi va estetik tarbiyasini yuksaltirishda g‘oyat muhim o‘rin va ahamiyatga ega bo‘lgan musiqa san’atini har tomonlama rivojlantirish, boy musiqiy merosimizni chuqur o‘rganish, yosh avlodni milliy va jahon musiqa san’atining mumtoz namunalarga muhabbat ruhida tarbiyalash, soha uchun yuqori malakali kadrlar tayyorlash tizimini yanada takomillashtirish maqsadida muhim vazifalar belgilandi.

Prezidentimiz tomonidan imzolangan ushbu muhim hujjatga muvofiq, O‘zbekiston davlat konservatoriyasi faoliyatini yanada rivojlantirish va takomillashtirishga doir chora-tadbirlar dasturi, mazkur bilim yurtining yangi tarkibiy tuzilmasi, konservatoriya faoliyatini yanada rivojlantirish va

takomillashtirishga doir chora-tadbirlar dasturini amalga oshirish bo'yicha Respublika komissiyasi tarkibi tasdiqlandi.

Mazkur dasturda bugungi kunda ma'naviy hayotimiz uchun muhim ahamiyatga ega bo'lgan bir qancha masalalarga alohida e'tibor qaratish zarurligi ta'kidlangan.

Jumladan, yoshlarning madaniy saviyasini yuksaltirish, ularni milliy va umumbashariy madaniyatning eng yaxshi namunalaridan bahramand etish, ma'naviy yetuk, milliy g'oya va mafkuramizga sadoqat bilan xizmat qiladigan barkamol shaxslarni tarbiyalash, o'zbek xalqining milliy musiqiy merosi negizida, jahon musiqa madaniyati durdonalaridan andoza olgan holda, musiqa san'atini rivojlantirish, musiqiy ta'lim tizimini sifat jihatidan yanada ko'tarish bo'yicha aniq chora-tadbirlar dasturda aks etishi lozimligiga urg'u berilgan.

Shuningdek, mulkiy yoki idoraviy bo'ysunuvidan qat'i nazar, musiqa san'ati, musiqa ta'limi yo'nalishi uchun kadrlar tayyorlash, normativ-huquqiy hujjatlar loyihalarini ishlab chiqish va ularni joriy etishda O'zbekiston davlat konservatoriyasi metodik va ijodiy tomondan ko'maklashadigan tayanch oliy ta'lim muassasasi ekaniga alohida urg'u berilgan.

O'zbekiston davlat konservatoriyasining moddiy-texnik bazasini yanada mustahkamlash, jumladan, konsert zallari, o'quv auditoriyalari, maxsus mashg'ulot xonalarini ta'mirlash va zamon talablari darajasida jihozlashga katta e'tibor qaratilgan.

Ayni vaqtda konservatoriyada faoliyat ko'rsatayotgan professor-o'qituvchilarning pedagogik mahoratini yanada oshirish, o'quv jarayoni sifati va saviyasini tubdan yaxshilash, musiqa san'ati sohasida jahonning yetakchi oliy ta'lim muassasalari, ijodiy markazlar, taniqli kompozitor, musiqachi va ijrochilar bilan hamkorlikni yo'lga qo'yish, jumladan, xorijiy mutaxassislarni mamlakatimizga taklif etish bilan bir qatorda respublikamizda yuqori natijalarga erishgan musiqachi va pedagoglarning mahorat darslarini chet davlatlarda tizimli tashkil etish zarurligi qayd etilgan.

O'zbekiston davlat konservatoriyasining yosh pedagog kadrlarini moddiy va ma'naviy qo'llab-quvvatlash maqsadida ular uchun zarur maishiy sharoitlar yaratish, ipoteka kreditlari asosida uy-joylar bilan ta'minlash bo'yicha aniq chora-tadbirlar ishlab chiqish va amalga oshirish masalalari ham dasturda o'z ifodasini topishi kerakligi belgilangan.

Hozirgi vaqtda O'zbekiston davlat konservatoriyasida o'quv binolari yetishmasligi, talabalar soni sezilarli darajada ko'paygani ta'lim-tarbiya jarayonlarini yuqori darajada va sifatli olib borishda muammo tug'dirmoqda. Qarorda ana shu masalani samarali hal etish choralari belgilangan. Shu maqsadda mutasaddi tashkilotlarga 2018/2019 o'quv yilidan boshlab Mirzo Ulug'bek tumani, Mustaqillik shoh ko'chasi, 31-uyda joylashgan V. Uspenskiy nomidagi respublika ixtisoslashtirilgan musiqa akademik litseyiga tegishli bo'lgan binoni O'zbekiston davlat konservatoriyasiga o'rnatilgan tartibda berish hamda Toshkent shahri, Buxoro ko'chasi, 10-uyda joylashgan binoni O'zbekiston davlat konservatoriyasi tasarrufiga o'tkazish va ushbu binoda jahon andozalariga to'liq mos keladigan, akademik jamoalarning badiiy dasturlari namoyish etiladigan, jonli ijroga mo'ljallangan zamonaviy konsert zalini barpo etish vazifasi topshirilgan.

Konservatoriyaning madaniy hayotimizdagi o'rni va nufuzini oshirish maqsadida O'zbekiston Respublikasi madaniyat vaziri bir vaqtning o'zida konservatoriya rektori vazifasini ham bajarishi qarorda belgilab berilgan.

Shu bilan birga, o'qituvchi va talaba yoshlarning ilmiy salohiyatidan unumli foydalanish uchun O'zbekiston davlat konservatoriyasi muassisligida "Musiqqa" ilmiy-uslubiy jurnali faoliyatini yo'lga qo'yish vazifasi belgilangan.

Bir so'z bilan aytganda, mazkur qaror Prezidentimiz tomonidan milliy musiqa san'atimiz rivojiga ko'rsatilayotgan yuksak e'tiborning yana bir amaliy namunasi bo'lib, u O'zbekiston davlat konservatoriyasi faoliyatini tubdan takomillashtirish, musiqa san'ati sohasida yuqori malakali kadrlar tayyorlash darajasini sifat jihatidan yangi bosqichga ko'tarishga qaratilgani bilan g'oyat muhim ahamiyatga egadir.

(O'zbekiston Respublikasi qonun hujjatlari to'plami, 2017-y., 33-son, 835-modda; Qonun hujjatlari ma'lumotlari milliy bazasi, 11.03.2021-y., 06/21/6186/0200-son)